

No Servus, Diener und Habe die Ehre!
Etze kummt dos

Nej su vos

vu Sömde, n 1. Juli 2023



Dr. Hans-Joachim Hübner

De Inflatiouszeit vu 1922/23

S word ötz jo vill driebr geredt, doß olles teurer gewurdn ös. Mr hiert de Leute jommrn, obr vur hundert Juhrn wor olles noch vill schlömmr. Deutschland wor nouch n orschtn Waltkriege om Ende. Zu dr Finanzierung vu dan Kriege wurdn sugenannte Kriegsanleihen rausgegahn. Dou wurdn n Leutn huche Zinsn vrsprochn und dos Gald solltn dann de besiegt Ländr zoröckezohln. S kom obr ganz andrsch. Deutschland hotte n Krieg vrlurn und mußte ungeheure Reparatiounszoehlungen leistn. Dos fuhrte dann zu ar riesichn Inflatoun. Wie ich gelasn ho, tote an Summr 1922 ejne Goldmark schon 270 Popiermark kostn. Ganz schlömm wor sch dann 1923. An Jännr totn de Franzousn und Belgier s Ruhrgebiet besetzn, weil Deutschland ne genung Reparatiounszeug liefern tote. De Reichsregierung ei Berlin tote zun passiven Widerstande ufruffn und tote de Liehne vun Orbeitrn bezohln. Doudrzune ließ se riesich vill Gald druckn. Dos fuhrte drzu, doß es dann nischt mieh wart wor. 1914, noch vur n Kriege, tote a Brut 32 Pfenniche kostn. An Jännr 1923 worn s dann schon 250 Mark und zun Juhresende — stellt euch ock vier — 200 Milliarden Mark! Dos Chaos horte orscht uf, wie Ende 1923 de Rentenmark eigefiehr't wur. De Leute hottn salte sehr vill Eifr, weil s ganze Gald, wos se of n Sporbichl hottn, weg wor.

Ar Tschechei wor sch ne su schlömm. De biehmsche Krune tote ihrn Wart behaln. Dou konntn de Leute theoretisch ötz ganz böllich ei Deutschland eikejfn. Obr su ejfach wor dos ne, weil s vrboutn wor, dos Zeug eizufiehrn. S göbt sugor a ahles Mundortheft aus dar Zeit. S hejßt „Blouserantoun's Valutarejse noch Berlin. Ane lostsche Geschöchte aus'n Juhre 1922“. Geschriebe hout s a Oswald Kraus aus Gablunz. Blouserantoun und seine Familie aus n Radl totn sich Pässe gahn lossn und fuhrn min Zuge frejdnavul nouch Berlin. Dorte ogekumm, worn se iebwälticht vu dan Trubel, dan brejtn Stroußn und dan villn Verkehre. Obr wenn mr ane Rejse macht, kon olles Megliche possiern. Seffl wär bale undr a Auto gekumm, ei ihrn Quotiere worn an Bette lautr Wanzn, und Blouserantoun hottn se ei ann Lokale de Kehte mit dr Uhr gestouhln. Se kucktn sich de Sehenswürdigkejtn ei dr Stoodt o, s Brandenburger Tor, de Siegessäule, gingn ei Museen und ei Oubdvranstaltungen, und se totn feste eikejfn, weil jo olles su böllich wor. S Nannl kejfte sich Blusn, Recke und Strömpe, Seffl und Jusef teure Oziege. Vul bepackt mit Kuffrn und Hockn und mit drei Hemden und Housn of ejmoul o — su ähnlich gingn de Leute jo ou bei dr Vrtreibung — fuhrn die fömfe min Zuge wiedr zoröcke. Ei Zittau totn se aussteign und wolltn ar Nacht iebr de Granze giehn. Obr de Finanzr hottn s rechtzeitig gesahn und honn se geschnoppt. Su wor sch nischt mit dan grußn Eikoufe und ubndruf krichtn se noch Stroufe. S ös halt doch bessr, wenn mr sich o de Gesetze hölt. Mejnt r ne ou?
